

Javnost u Sanskom Mostu sumnjičavo vrti glavom na najavu dolaska prljavih tehnologija u njihov kraj.

Najavljen krajem prošle godine kao strateška investicija u Bosnu i Hercegovinu, projekt "Rudnik i termoelektrana Kamengrad" u Sanskom Mostu, međutim, izaziva u tom gradu na Sani mnogo više straha nego oduševljenja koje su iskazali promotori te investicije: Agencija za unapređenje stranih investicija Bosne i Hercegovine, ministar vanjske trgovine i ekonomskih odnosa Mirko Šarović, kineska grupacija China Energy Group i kompanija iz Posušja Lager d. o. o., čiji su predstavnici u novembru prošle godine u Budimpešti potpisali Memorandum o saradnji na realizaciji ovog projekta, čija je procijenjena vrijednost 500 miliona eura.

Štaviše, ovdje većina sumnjičavo vrti glavom na najavu dolaska "prljavih tehnologija", kojih se razvijene zemlje svijeta strateški odriču. Današnja podjela letaka građanima od aktivista Nezavisnog bloka u Sanskom Mostu sa sloganom "Rudnik DA, termoelektrana NE" ponovo je ukazala na strah i sumnje da bi ta "bjelosvjetska" investicija s termoelektranom snage 430 megavata u dva bloka u potpunosti uništila krajolik i vodotoke prekrasne doline i spriječila sva druga rješenja i perspektive razvoja tog kraja.

"Sanski Most treba svoj ekonomski razvoj zasnivati na većim ulaganjima u razvoj malih i srednjih preduzeća, proizvodnji hrane za tržište, posebno zdrave hrane. Lokalna vlast treba raditi na izgradnji ambijenta za dolazak zainteresiranih firmi iz EU-a. Smatram da se rudnik Kamengrad treba maksimalno osposobiti radi prodaje uglja postojećim termoelektranama", smatra Nijaz Kadirić, zastupnik u Skupštini Unsko-sanskog kantona.

Jedina zemlja koja gradi termoelektrane

Kadirić navodi da se "umjesto pogrešne 'vizije' razvoja kroz kinesku termoelektranu treba okrenuti korištenju sredstava EBRD-a (Evropske banke za obnovu i razvoj) za obnovljive izvore energije i gradnju protočnih mini hidrocentrala".

"Bosna i Hercegovina će biti jedina zemlja u Evropi koja u 21. stoljeću gradi termoelektrane. Nećemo doći na 'zelenu granu' najavljenom 'strateškom' investicijom. Pogledajte gradove koji imaju termoelektrane: Gacko, Stanare, Ugljevik, Kakanj i bit će vam sve jasno", konstatuje Kadirić.

Zanimljivo je da je potpisivanje Memoranduma u Budimpešti između kineske i bh. kompanije došlo samo nekoliko dana nakon samita o klimi u Bonnu, gdje je 18 država najavilo izbacivanje korištenja uglja u proizvodnji električne energije do 2030. godine.

Velika Britanija, Kanada, Danska, Finska, Italija, Francuska, Holandija, Portugal, Belgija, Švicarska, Novi Zeland, Etiopija, Čile, Meksiko, Angola, Luksemburg, Kostarika i Maršalovi Otoci formirali su Savez za proizvodnju energije bez uglja. Ta alijansa do samita UN-a o

klimi, koji treba biti održan ove godine u poljskim Katowicama, radit će na povećanju broja članica. Cilj alijanse jest da do tog samita naraste na 50 članica.

Bosna i Hercegovina očito ima neke druge planove.

Naime, Vlada Federacije BiH na 59. sjednici još 2016. godine donijela je odluku kojom izgradnju termoelektrane u Sanskom Mostu svrstava u strateški projekt u energetici u Bosni i Hercegovini.

Izvor: balkans.aljazeera